

## Profesionalna/ karijerna orijentacija

U periodu 24.02.2017. – 31.03.2017. održana su predavanja i radionice od strane Fikrete Žunić, pedagoga škole, učenicima završnih razreda (maturantima) iz oblasti Profesionalne orijentacije. Ciljevi predavanja i radionica bili su sljedeći:

1. Upoznati maturante sa značajem, svrhom i uslugama koje pruža Zavod za zapošljavanje KS,
2. Pomoći učenicima da donesu pravilnu odluku kuda poslije srednje škole,
3. Upoznati ih sa kriterijima i zahtjevima za upis na visokoškolske institucije,
4. Upoznati ih sa zahtjevima i potrebama tržišta rada,
5. Upoznati ih sa suficitnim i deficitnim zanimanjima,
6. Objasniti učenicima razliku između profesionalne i karijerene orijentacije,
7. Motivisati učenike za cjeloživotno učenje te ukazati im na potrebu permanentnog učenja. Dati učenicima informacije o ostvarivanju prava putem Zavoda za zapošljavanje te rok prijave u pomenutu instituciju kao i upoznavanje sa posljedicama ukoliko se učenici ne prijave u zakonski predviđenom roku.

Pored predavanja, realizirana je radionica koja je imala za cilj učenicima pomoći u pisanju biografije, vježbanju socijalnih vještina za apliciranje na posao, razvijanju empatije te kompetencija kao što su: jezičke, digitalne, socijalne, poduzetničke i dr.

Sprovedeno je i mini istraživanje sa učenicima IV razreda, te su učenicima, roditeljima i članovima Nastavničkog vijeća prezentirani rezultati anketiranja čiji cilj jeste saznati *Profesionalne namjere učenika nakon srednje škole*. Također, podijeljeni su im letci Zavoda za zapošljavanje KS i to: *Kako se prijaviti za posao* i *Izvodi iz propisa koji se primjenjuju u oblasti posredovanja pri zapošljavanju*. Pored saradnje sa učenicima, profesionalna orijentacija je realizirana i sa roditeljima putem roditeljskih sastanaka. Dana, 26.09.2016. održano je predavanje za roditelje III i IV razreda (maturanata) pod nazivom: *Učešće mladih u lokalnoj zajednici*. Cilj predavanja bio je ukazati roditeljima i učenicima na značaj volontiranja i uključivanja u različite nevladine organizacije, udruženja, putem kojih mladi ljudi mogu steći nova iskustva, stažirati i sl. U mjesecu novembru, održano je drugo predavanje za roditelje pod nazivom *Kuda poslije srednje škole* gdje im je predočeno šta sve utječe na izbor zanimanja, na dalje profesionalno usmjeravanje, razvoj karijere i slično. Također, predočene su im informacije o studiranju i zapošljavanju. Predavanje je održano i u februaru mjesecu pod nazivom: *Upoznavanje sa aktuelnim potrebama tržišta rada – III razred-maturanti* i *Informisanost učenika i roditelja o kriterijima za upis na visokoobrazovne institucije kao i aktuelne potrebe tržišta rada – maturanti/IV razredi*. U martu 2017. roditeljima je realizirano predavanje *Profesionalna/ karijerna orijentacija* gdje su, između ostalog, upoznati sa svim aktivnostima koje su se realizirale u školi iz oblasti Profesionalne orijentacije. Također, podijeljeni su im letci JU Zavoda za zapošljavanje KS s ciljem dodatnih informacija o pravima koja njihova djeca mogu da ostvare. U narednom periodu nastajat će se učenicima obezbijediti prezentacija određenih fakulteta, kao što su: Ekonomski, Pravni i drugi, a uzimajući u obzir želje i interesovanja učenika.

MA Fikreta Žunić, pedagog